

古  
豐  
識  
畧  
四





古豐識畧卷二十七

長白鍾秀石帆

初稿

寧縣張曾小袁

人部

兵防 附俸餉

綏遠城八旗滿洲蒙古兵三千二百名內馬兵二千  
名步兵七百名養育兵五百名編為滿洲十六佐領  
蒙古四佐領每佐領下設佐領一員防禦一員驍騎  
校一員共佐領十五員協領兼佐領五員防禦二十  
員驍騎校二十員管理旗務其各佐領均有圖記





協領五員佐領二十員每協領管理佐領四處該佐領遇有事故呈明協領轉呈將軍副都統辦理其協領俱有關防以上各員係將軍副都統由旗兵內挑選送部引見

綏遠城有左右二司設翼長二員各頒給關防由協領內挑選咨報兵部左司管理操演兵丁命盜鬥毆賭博案件右司管理兵丁錢糧戶婚田土廠地案件均呈明將軍副都統

將軍衙門有滿洲筆帖式二員蒙古筆帖式一員均由該旗內考取



經遠城世襲有三等輕車都尉二員騎都尉二員雲  
騎尉一員恩騎尉十員

將軍每年俸銀一百八十兩養廉銀五百八十六兩  
二錢六分粳粟米石折銀六十兩六錢六分隨甲餉  
銀米石折銀一百七十九兩一錢六分人役工食銀  
二百八十八兩馬四十四匹草豆銀五百六十八兩  
二錢六分預支草銀一百六十六兩三錢二分共銀  
二千三十七兩六錢六分本色粟米五十七石  
副都統每年俸銀一百五十五兩養廉銀六百兩俸  
米一百四十七石二斗五升



每協領一員給衙署一所每年俸銀一百三十兩粳  
粟米石折銀五十三兩九錢一分馬十二匹草豆折  
銀一百八十七兩一錢一分預支草銀四十五兩三  
錢六分共銀四百一十六兩三錢八分本色粟米四  
十二石

每佐領一員給衙署一所每年俸銀一百五兩粳粟  
米石折銀三十八兩一錢一分馬八匹草豆折銀一  
百二十四兩七錢四分預支草銀三十兩二錢四分  
共銀二百九十八兩一錢四分本色粟米二十七石  
每防禦一員給衙署一所每年俸銀八十兩粳粟米



石折銀二十八兩七錢一分馬五匹草豆折銀七十  
七兩九錢六分二釐五毫預支草銀十八兩九錢共  
銀二百五兩五錢七分二釐五毫本色粟米十八石  
每驍騎校一員給衙署一所每年俸銀六十兩粳粟  
米石折銀二十五兩五錢六分馬四匹草豆折銀六  
十二兩三錢七分預支草銀十五兩一錢二分共銀  
一百六十三兩五分本色粟米十五石

每筆帖式一員給衙署一所每年俸銀二十一兩一  
錢一分四厘粳粟米石折銀二十五兩五錢六分馬  
四匹草豆折銀六十二兩三錢七分預支草銀十五



兩一錢二分共銀一百二十四兩一錢六分四厘本色粟米十五石

輕車都尉每年俸銀一百六十兩騎都尉每年俸銀一百二十兩雲騎尉俸銀八十五兩其米石馬匹折銀數目均與防禦同恩騎尉每年俸銀四十五兩粳粟米折銀二十二兩四錢一分馬三匹草豆折銀四十六兩七錢七分七厘五毫預支草銀十一兩三錢四分共銀一百二十五兩五錢二分七厘五毫本色粟米十二石

每馬兵一名給房二間每年餉銀三十六兩粟米折



銀十五兩七錢五分馬一匹草豆折銀二十八兩六錢六分五厘共銀八十兩四錢一分五厘本色粟米十五石

每步兵一名給房二間每年餉銀十八兩粟米折銀三兩一錢五分共銀二十一兩一錢五分本色粟米十二石

每養育兵一名每年給餉銀十八兩並無房間米石統計經遠城自將軍而下官員兵丁每年俸餉共銀二十萬九千一百九十五兩本色粟米三萬九千九百九十八石二斗五升



以上綏遠城

土默特分左右翼男婦約萬餘名口兵丁五千名編

為六十佐領管轄兵丁均與糧餉種地為食

每名種地一頃

兵丁五千名內前鋒二百名領催三百六十名披甲  
四千四百四十名每年春秋二季派撥一千名操演  
為操演營二月九月每名月給銀一兩五錢其餘每  
月輪派各處當差

六十佐領下各設佐領一員驍騎校一員共佐領四  
十八員參領兼佐領十二員驍騎校六十員均無俸  
餉亦種地為食



參領十二員每參領管五佐領各頒給關防一顆以上各官由該旗蒙古內挑選咨送理藩院帶領引見遇有處分案件折罰牲畜

土默特有兵司戶司操演營三處各設翼長一員頒給關防由十二參領內挑選咨報理藩院其兵司管理命盜鬥毆賭博案件其戶司管理兵丁戶口田土案件如綏遠城左右司其操演營則專管春秋二季操演兵丁該三處遇有事務仍呈請副都統辦理不得自專

以上土默特



歸化營都司一員把總外委額外委各一員兵一百八十五名清河汛外委一員兵二十九名沁昌汛外委一員兵二十七名多爾濟汛外委一員兵二十一名薩拉齊汛把總外委各一員兵四十四名色頭汛把總一員兵十九名共兵三百二十五名乾隆二十六年由甯武營屬之利民營移駐其都司營房即前都統公署舊址改設

以上綠營

謹按自我

朝統一寰宇西則西安甯夏東則江甯京口南則杭



州荊州東南則廣東福建巖疆所在設立八旗  
駐防官兵統其任者非公侯勳戚即宗室天潢  
責綦重也嗣以承平日久徙置不一康熙三十  
三年

聖祖仁皇帝特遣禁旅五千駐防右衛至湯平噶爾  
丹後撤去護軍統領參領護軍校等員惟將軍  
以下鎮守如故至乾隆二年移駐綏遠城二十  
八年因歸化城裁去都統始與副都統互管旗  
兵及土默特兵並添設綠營官兵所制極為周  
密且旗兵綠營兵弁俸餉優渥惟土默特分種




地畝寓兵于農劍戟耰鋤雖並行不廢而潛移  
默化君子于此有深心焉近則五千之設已成  
虛名所有操演兵一千實止有此數非從前輪  
派者比其所種地畝亦半行典賣除春秋月給  
銀一兩五錢而外餉需無出每遇徵調所及軍  
裝器械籌備維艱較之綏遠城旗兵與綠營官  
兵因銀數減成而仰俯不給者又大相懸隔矣  
頃聞山後各招寺有草廠地畝尚待開墾倘能  
以其半援照乾隆八年及三十七年嘉慶五年  
十年等例酌量撤回墾種並立定章程按兵丁



名數分給其地雖距城遙遠或令子弟耕種或  
收受租佃銀米其因事斥革及本身已故者即  
將地畝交出令補額人承種不得據為世業擅  
自典賣至前次所賣地畝民人耕種已久前後  
或屢易主名如果有契紙可憑許仍舊管業毋  
庸紛紛聚訟惟基地畝數必須勘明不得越界  
侵占此法似於蒙民均有裨益官吏亦免滋擾  
是在留心邊務者熟籌之耳鄙說未敢遽信也







古豐識畧卷二十八

長白鍾秀石帆

初稿

崞縣張曾小袁

人部

宦績

漢

魏尚文帝十年為雲中守虜騎引避不近塞者數年  
十四年躡入尚率車騎追之殺馘甚衆上功幕府級  
不相應徵下吏輸將作徒一日帝念雲中撫髀而思  
賢將問及馮唐曰吾居代數聞趙齊之賢唐曰陛下



雖得願牧不能用也魏尚大有邊功一言不相應而  
文吏即繩以法使豪傑墮氣士卒離心由此言之陛  
下近失魏尚而反遠慕願牧哉帝悅即日令唐持節  
赦尚復以為雲中太守

毆

孟舒文帝時為雲中守坐虜大入雲中免田叔對文  
帝曰匈奴來為邊寇孟舒知士卒罷敝不忍出言士  
臨城死敵如子為父以故死者數百人孟舒豈毆之  
哉上曰賢哉孟舒復召以為雲中守

容齋隨筆謂孟舒魏尚皆以文

帝時為雲中守皆坐匈奴入寇獲罪皆得士死力皆用他人言復故官事切相類疑其祇一事云

李廣隴西成紀人猿臂善射有膽畧才氣文景武帝



時為驍騎都尉歷上谷雲中雁門等七郡太守屢將  
兵擊匈奴善撫下得士卒死力遇大敵持重不驚意  
氣自如數與虜角為虜所得奪馬奔馳射殺追騎威  
鎮匈奴號飛將軍以數奇不得封侯論者惜之

廉范杜陵人明帝時舉茂才數月遷雲中太守十六  
年春邊外大入塞烽火日逼故事戎騎過五千移檄  
旁郡請援吏以為請范不聽自率郡兵拒之會日暮  
范令軍中每人各縛兩炬三頭爇火營中星列望者  
謂救兵大至驚欲遁范乃令軍蓐食馳往赴之戎騎  
擾亂自相躡藉由此不復向雲中



陳龜字叔珍上黨潞氏人家世邊將便習弓馬少有志氣永建中舉孝廉五遷五原太守永和五年拜使匈奴中郎將時匈奴左部反亂龜以單于不能制下外順內叛從令自殺後徵為尚書時梁冀暴虐日甚龜上書言其罪狀請誅之帝不省自知必為冀所害不食七日而死并涼民庶咸為舉哀弔祭其墓

崔實素有重名延禧元年冬拜五原太守五原土宜麻桑而俗不知織民冬月無衣實至作紡績織維練之具教之民有餘衣焉是時戎騎連入一歲至九奔命寔烽堠謹士馬練虜自是不復犯五原



北魏

源懷賀之子孝文遷洛陽北邊荒遠百姓饑饉乃加  
懷行台巡北邊賑貧民以邊境事少而置官猥多乃  
奏裁五之一柔然侵邊詔懷指授規畧以便宜從事  
懷至柔然已遁懷案視要害之地及儲糧積伏之宜  
犬牙相救之勢凡五十八條分兵置戍勸農積粟北  
方無憂懷性寬簡常曰為大人當舉網維何必事事  
詳細譬如為屋外望高顯楹棟平正基壁完牢足矣  
斧斤不平斲削弗密非屋之病也仕至驃騎大將軍  
馮翊公諡曰忠



隋

魚俱羅馮翊人氣壯聲宏言聞數百步拜豐州總管  
突厥入境輒擒斬之自是屏跡不敢南下

唐

李靖字藥師京兆三原人太宗時突厥入寇以靖為  
定襄道行軍總管率勁騎五千夜襲定襄破之突厥  
頡利走保鐵山遣使謝罪請舉國內附帝使靖迎之  
又遣鴻臚唐儉將軍安修仁慰撫靖謂副將張公謹  
曰詔使到虜必自安若萬騎賚二十日糧自白道襲  
之必得所欲遂督兵疾行去其牙七里乃覺部衆驚



潰斬萬餘級俘男女十萬殺義成公主頡利亡去為  
大同道行軍總管張寶相擒以獻于是斥地自陰山  
北至大漠後又破吐谷渾封衛國公年七十九薨諡  
曰景武

徐勣字懋功賜姓李曹州人累功拜并州都督為通  
漠道行軍總管出雲中引兵與李靖合屯碛口降突  
厥封英國公太宗嘗曰煬帝不擇人守邊勞中國築  
長城以備虜今我用勣守并突厥不敢南下賢于長  
城遠矣

裴行儉字守約絳州聞喜人調露元年為定襄道行



軍大總管用兵持重料敵制勝討突厥屢戰皆捷餘  
黨悉平

唐休璟名璿以字行京兆始平人為朔州刺史永淳  
中突厥圍豐州都督崔智辨戰死朝廷議棄豐州保  
靈夏休璟疏止之曰豐州控河過寇號為襟帶自秦  
漢以來常郡縣之土田良美宜耕牧隋季喪亂不能  
堅守乃遷就甯慶戎羯得以乘利而交侵始以靈為  
邊唐初募人實之西北一隅得以完固今而棄之則  
河旁地復為賊有而靈夏不足自安非國家利也高  
宗從其言



張說字道濟其先自范陽徙河南永昌中策賢良方正說所對第一授太子校書遷右羽林將軍檢校并州長史兼天德軍大使時朔方軍大使王晙誅河曲降虜阿布思也九姓同羅拔野固等皆疑懼說持節從輕騎二十直詣其部宿帳下召見酋豪慰安之副使季憲以虜難信不宜涉不測說報曰吾肉非黃羊不畏其食血非野馬不畏其刺見危授命亦吾效死秋也由是九姓遂安

張仁愿華州下邳人武后時以殿中侍御史遷并州都督長史進左屯衛大將軍始朔方軍與突厥以河



為界北崖有拂雲祠突厥每犯邊必先謁祠禱解然後料兵度而南時默啜悉兵西擊突騎馳去仁愿乘虛取漠南地于河北築三受降城絕虜南寇路斥地三百里而遠自是突厥不敢踰山牧馬減鎮兵數萬歲省費萬億後人思之為立祠受降城出師輒祭享焉

婁師德原武人天授初檢校豐州都督儉約率下衣皮袴每患軍輸不給乃悉屯田積粟百萬兵用饒足無轉餉和糶之費

顏真卿開元中為監察御史時五原有冤獄久不決



天旱真卿辨獄而雨人呼御史雨

郭子儀華州人天寶八年以安北都護振遠橫塞軍使兼五原太守充朔方節度使置橫野軍於木刺山後以地瘠徙軍永清城號天德軍安祿山反與李光弼克復兩京累封令公進爵汾陽王號尚父以壽終陪葬建陵

李景畧幽州良鄉人大歷末拜豐州刺史天德軍都防禦使窮塞苦寒地瘠鹵邊戶勞瘁景畧至節用約已與士卒同甘苦鑿感應永清二渠溉地數百頃儲廩器械畢具威令肅然以禮制虜聲雄北疆回紇畏



之卒於屯贈工部尚書

任迪簡京兆萬年人擢進士第李景畧表佐其軍嘗  
宴客行酒者誤進醢景畧用法嚴迪簡不忍其死飲  
如酌徐以他詞請易之軍中悅其長者景畧卒舉軍  
請為帥授豐州刺史天德軍使公私缺乏欲饗士無  
所給至與門下同糲食身居戰戶踰月軍中感其公  
請安卧內乃許三年上下完充卒贈刑部尚書

石雄徐州人會昌初回鶻入寇掠雲朔五原塞詔雄  
為天德軍防禦副使追寇至殺虎山斬首萬級迎太  
和公主還進豐州防禦使



明

王崇古蒲州進士累官右都御史隆慶四年總督宣  
大軍務時馬市雖開而趙全等勾引叛服不常崇古  
至練卒守要害防禦維謹會俺答孫把漢那吉來降  
崇古留之因而為市使俺答縛趙全等八人以獻送  
還那吉俺答貢名馬納款五十餘年邊境又安烽烟  
頓息崇古之力也晉兵部尚書蔭一子錦衣衛千戶  
後總督吳克鄭洛繼之終明之世無虜害焉

國朝

費揚古滿洲正白旗人父鄂碩為 端敬皇后父以



朔

欽定四庫全書

功封三等伯十四歲襲父職擢領侍衛內大臣撫遠

大將軍駐扎邊境經輯蒙古鎮守歸化城等處地方

從征厄魯特遷晉爵內大臣一等公時歸化城商販

初集蒙古兵弁強攫貨物有索價者輒倚勢凌暴商

民苦之公至力除其弊犯者即懲以法康熙三十七

年二月朔奉特命回京師塞外兵民商賈攀轅送別

立祠以祀至今香火不絕按款平府志於名宦則曰伯費揚武正白旗滿州人

以內大臣撫遠大將軍兼攝右衛建威將軍康熙三

十五年統滿漢兵出殺虎口與大同總兵康調元殺

虎協鎮王元登天山過瀚海直抵拓摩多地方征剿

厄魯特噶爾圖丹飲藥死擒其妻子以歸斬獲甚

衆凱旋論功封為一等公於祠祀則曰白將軍生祠

於八旗駐所將軍則載伯費揚武宗室費揚古二人



載

曰伯費揚武正白旗滿洲人康熙三十四年以內大臣安北大將軍兼攝右衛將軍事宗室費揚古正藍旗滿洲人康熙三十五年由右衛左翼護軍統領擢補后封輔國公於藝文則裁歸化城撫遠大將軍費公祠堂碑記白大將軍生祠等詩所謂大將軍者皆指伯費揚武而言名宦祠記駐防將軍以及藝文所志與費揚古顯屬兩人雖伯之與白之與費稱謂不一而要與名古者無涉也及讀邵陽魏氏所撰聖

武記中

聖祖仁皇帝親征準噶爾一事則並無伯費揚武之名而康熙三十一年五月噶爾丹遣使至歸化城其遣兵迎詰且過止者將軍費揚古也三十五年噶爾丹將入寇其與振武將軍孫思克等率陝甘兵出西路邀其歸者大將軍費揚古也我軍至昭莫多其率左右翼步騎先據小山次魔沿河伏騎橫衝入陣乘夜追北三十餘里斬數千級降三千眾并殪其可敦阿奴三十六年以噶爾丹自伏天誅奏者無一非費揚古也殷提督西征記善亦言撫遠大將軍為費揚古于清端公年講於西路班師由中路歸者亦言費大將軍至袁簡齋文集中有領侍衛內大臣撫遠大

古豐識署 人部 卷二十八 宦績 八



將軍費襄壯公傳則曰費公揚古滿洲正白旗人居  
董鄂地方以地為氏數家所紀費大將軍功烈俱與  
府志伯費揚武同而簡齋所作傳中有世襲三等伯  
一語正伯字來歷是伯費揚武與費揚古決非兩人  
矣且我國語謂老生子曰飛鴉昂脈或書曰費揚烏  
烏古武但取其音本無定字無俟深考惟府志成於  
雍正十一年距費大將軍時未遠傳聞不應如是之  
異且駐防名姓與到任年月尚歷歷可指是一人耶  
是兩人耶何宗室與伯白古與武藍旗與白旗  
大相懸殊自相矛盾乃爾至俗傳誅活佛遇害之說  
顯與碑記所云命歸勳第傳所云薨謚襄壯者異齋  
東之語更不足辨矣塞外文獻無徵行篋中又祇此  
數卷書以致大將軍名姓尚無確說則姑據諸家傳  
記以正府志之誤俟遇知者再為論定云

通智滿洲人康熙中以兵部尚書奉使來城為會盟  
使有威重諸藩畏服時丹津為右翼都統和衷共濟  
遇事必相諮度如土默特文廟官學倉庫教場以及



先農壇之設俱合銜會奏奉

旨允行以整飭邊防興行教化為己任一時規模制度煥然改觀迄今頌都護功者無不謂大司馬多協恭之力云

丹津土默特人初授侍衛兼在京佐領職康熙四十年父古睦德卒始襲歸化城都統五十九年兼襲三等子雍正元年因商民為建生祠奏請改建文廟設左右翼學增設理事同知招商勸農教養兼備為商賈十二行及農圃各村莊墾種之始乾隆元年設馬廠于城北詔以丹津董牧務並協理綏遠築城事



宜商民秋毫無擾二年卒與費大將軍合祠崇祀一  
子名達奈居京由世襲佐領歷官散秩大臣早逝無  
子以丹津族子札什泰襲及丹津卒其妻請即以札  
什泰為嗣詔停襲都統職仍襲三等子兼三等男

劉統勳山東諸城人乾隆中以大學士奉使來城勘  
訛將軍保德同知普喜互訐一案改裝易服出關月  
餘人莫之識後寘保德普喜等於法並杖斃蠹役白  
德明其餘官吏分別定罪無枉無縱去後數年每見  
有病痿白髮者輒相驚謂公又微服至矣其明察不  
著遠邇直聲動人如是一時多陰受其福卒諡文正



祀賢良祠

齊布森滿洲人嘉慶元年莅歸綏道任愛民如子凡  
布縷粟米力役之征悉行蠲免三年奉文辦運軍營  
茶塊蒙古員弁向城鄉居民及過往客商強索牲畜  
越界包送甚或調換駝隻高民不堪其擾公出示嚴  
禁令蒙員自行備辦毋許勒派閭閻一時咸愛戴之  
在任八年擢粵西臬旋陞豫藩以去商民思其德為  
立象費公祠與大將軍暨丹都護並崇祀焉

蔣丹林  
散樗老

人自記年譜嘉慶二十三年戊寅十二月二十六日  
固都察院辦理京察錯謬與滿洲副都御史齊布森  
同降為從三品候補道光元年八月十八日石對蒙  
上垂詢汝與齊布森同降係實降一級諄諄



天語其簡在  
帝心久矣此後未詳其補授何職識以俟考

德給滿洲人嘉慶八年以吏部郎中簡任歸綏觀察  
因義學廢弛日久捐廉興修設立規條至今遵行未  
替于城南創置義塚一所掩皆埋骸有澤及枯骨之  
頌焉先後往任十年擢陞長蘆鹽運使

松筠字湘浦滿洲人嘉慶十年以兵部尚書奉使來  
歸化城讞烏拉特三公事並署理綏遠城將軍先是  
札薩克中公車楞旺楚克多爾濟重斂苛虐其下經  
協理台吉圖斯拉克齊車楞敦多克密都布約七十  
餘人聯名訴告正盟長西公巴圖鄂齊爾副盟長東



公拉特那巴拉積不能究公廉得其情奏削中公札  
薩克印正盟長交理藩院議其印改派副盟長拉特  
那巴拉代治之道光十二年以大學士奉使勘定大  
青山後各旗游牧界址事見地部疆域諸蕃畏威懷德公勤  
于任事遇地方爭訟立為剖決性復慈惠遇老幼殘  
疾者時賑卹之居民謂我

朝欽使其尤令人畏服愛戴者自劉文正公而後惟  
公一人去之日繪象祀費公祠卒諡文勤

斌良字笠耕滿洲正紅旗人嘉慶十年以刑部郎中  
隨湘浦尚書讞烏拉特三公案其訊斷奏疏等務尚



書悉以屬公。過地方爭訟亦多，委鞠一時，頌松公者必并及公焉。駐城兩月，所著有輜車振遠、雁門迴響等集，自赴綏遠城及歸化城行館感懷，至晚抵胡家屯，計詩百二十餘首。詩集未及採錄後官駐藏大臣卒于任。

將軍祿成嘉慶二十四年正月莅任，觀察岳祥七月莅任時，蒙古佐領因行高赴山後各部落貿易，私立小票木戳給發執照，需索百端，商旅幾至裹足。道光元年，經將軍奏明交晉撫委員查辦，觀察會同審訊，將各員懲治，商賈昏頌其德，為立碑費公祠。



哲成額字省庵滿洲正紅旗人道光中任綏遠城糧  
餉同知收放銀米必躬視出納胥吏無侵尅弊遇委  
審事件判決如流軍民咸稱頌焉隨松湘浦相國勘  
量大青山後游牧界址及安設各卡倫相國輒倚公  
如左右手去任之日行李蕭條不名一錢至今塞上  
言清德者必首推公云

顧兆魁直隸清苑縣人咸豐二年八月以和林格爾  
巡檢奉委解湖南軍餉遇賊殉難經部議卹世襲雲  
騎尉

按天下十八省會以近府廳州縣文廟兩廡而



外俱有名宦鄉賢二祠官斯土者生有善政及  
民歿則地方紳庶合詞籲請從祀名宦以為崇  
德報功之舉春秋仲丁享祀不忒所在皆然惟  
歸化城文廟係土默特蒙古專立其名宦鄉賢  
兩祠俱未題請從祀名宦祠所奉粟主五人為  
兵部尚書通智大學士松筠左都御史前綏遠  
城將軍昇寅副都統伊星阿吉林將軍前副都  
統宗室祥康率皆以長生祿位送入非奉

旨准予從祀者此識畧因名宦兩字既難徵實第列  
宦績一門取漢唐以至



國朝曾為宦于茲而政績流傳史冊播誦人口者古  
今得二十餘人如晉之劉殷為新興太守魏之  
赫連達為雲州刺史宋之王承美為豐州刺史  
與漢之李興隋昱以五原人為五原太守者同  
故為立傳於鄉賢部中而宦績未列其名將來  
如有名宦鄉賢祠祀則其名當兩存之費公祠  
所奉長生祿位塑象三粟主及湘浦相國繪象  
而外有鎮國公將軍奕灝將軍昇寅祿成副都  
護祥康觀察岳祥忠徵署觀察珠瀾司馬文明  
魁英雙奎清勳別駕慶麟珠隆何等名惟祿將



軍岳觀察宦績見前其餘事實無考或其人現  
在未合紀傳之例俱附識其名如左



古豐識畧卷二十九

長白鍾秀石帆

初稿

崞縣張曾小袁

人部

鄉賢 分立德立功立言

晉

劉殷字長盛新興郡人高祖陵漢光祿大夫殷七歲  
喪父哀毀過禮服喪三年未嘗見齒曾祖母王氏盛  
冬思董不得殷時年九歲痛哭澤中若有止之者收  
淚視地有董生焉又嘗夜夢人謂西籬下有粟窟而



掘之得粟十五鍾時人嘉其孝感弱冠博通經史有  
濟世材州郡屢徵不起齊王攸征南將軍羊祜辟召  
皆以疾辭同郡張宣子勸之就召殷曰王母在堂應  
命便不得就養宣子曰識量若子當為吾師以女妻  
之及王氏卒殷夫婦毀瘠後有二白鳩巢其庭樹自  
是名譽日著太傅楊駿禮聘殷以母老固辭趙王倫  
篡位以散騎常侍徵之殷逃奔雁門及齊王同輔政  
辟為大司馬軍容祭酒既至拜新興太守有七子五  
子各授一經一授史記一授漢書一門之內七業俱  
興北州之學獨盛殷後以壽終

按立德兩字古難其人豐州地極邊隅生



材寥寥欲求如劉新興者不數觀矣然孝為百行之首果其孝行純篤自不能不以立德予之府志舊載唐時有烽子者豐州人永泰初暮出為党項掠去與西番易馬番將令穴肩骨貫以皮索配馬數百蹄與之牧經半載馬蕃息番將賞以羊革數百因轉近牙帳替普子愛其了事遂令執蠹左右有積肉餘酪與之又居半年因與酪肉悲感不食替普問之云有老母頻夜夢見替普隣之夜召帳中語曰番法嚴無放還例與爾馬有力者兩匹間道縱爾歸毋言我也烽子得馬遂逃馬俱乏死因晝潛夜走數日為刺傷足倒積中忽有風吹物窻牽過其前因攬之裹其足有頃不復痛試其步走如故信宿及豐州界歸家見母母悲且喜曰自失爾我惟誦金剛經寢食不輟以祈見爾今果如願亟取經拜之縫斷處亡數幅不知其由子因道積中傷足事母令解足視之所裹瘡物乃數幅經也其事頗涉怪異附識於此

以上立德

漢



李沮雲中人事景帝至武帝時以左內史為疆弩將軍

郭昌雲中人以校尉從大將軍衛青以大中大夫為拔胡將軍屯朔方

趙破奴九原人嘗亡入匈奴已而歸漢為驃騎將軍司馬以功封從騎侯

李興五原人王莽篡漢興起兵自稱將軍從匈奴言迎蘆芳入塞立為漢帝都九原以興為五原太守後以事誅

隋昱五原人與李興同起兵稱將軍迎蘆芳芳以昱



留守九原後芳亡入匈奴其衆盡歸昱昱乃隨漢使  
程恂詣闕拜五原太守封錫胡侯弟憲為武進侯  
裴遵雲中人為燉煌太守光武既得河南四郡召見  
郡邑吏以遵為賢從征蜀帝既還命遵率偏師從大  
司馬吳漢討公孫述定蜀地有功曾孫曄為遼東將  
軍遷聞喜

北魏

羅結玉林衛人先世領部為魏附臣劉顯之逆結從  
道武幸賀蘭部後以功賜爵曲蛇侯太武初累遷侍  
中外都大官總三十六曹事年一百七歲精爽不衰

落



太武以其忠慤甚信待之監典後宮出入卧内因除  
長秋卿年百一十詔聽歸老賜大甯東川為私第別  
業並為築城號曰羅城朝廷每有大事驛馬詢問焉  
年百二十卒贈幽州刺史諡員子斤從太武以力戰  
有功賜爵帶方公卒諡靜陪塋金陵子敢襲爵位軍  
部尚書卒子伊利襲

赫連達字朔周盛樂人勃勃之後改姓杜性剛勁有  
膽力少從質拔岳征討有功及岳為侯莫陳悅所害  
達馳往周文清兵定亂魏孝武入關褒叙勲義復姓  
赫連除雲州刺史進爵為公雖非文吏然性質直遵



奉法度廉儉自持達欲招集異類報以繒帛主司請  
用官物達曰羊入我厨物出官庫是欺上也令取私  
帛與之識者嘉其仁恕尋進爵樊川郡公位柱國

唐

顧彥朗豐州人其弟彥暉並為天德軍小校其使蔡  
京以朗暉兄弟有封侯相每厚禮之稍稍進秩黃巢  
亂長安率軍同復京師以功遷朗右衛大將軍擢拜  
東川節度使節為壁州刺史王建所奪因率兵攻之  
朝廷屢遣中使諭解建拒命不奉詔圍急暉與其門  
下親信諸將自殺史稱暉詳緩有儒者風為王建所



忌

後五代

董重進

董一作孫

振武人晉王李克用破朔州得之賜姓

名李存進從破黃巢事唐莊宗戰河上舟兵來往頗  
以為勞存進乃以葦笮維大艦為浮橋莊宗大喜解  
衣賜之以功遷振武節度晉討張文禮于鎮州以存  
進為招討軍於東垣渡東垣土惡築壘不能就存進  
伐木為柵文禮于處球以兵千餘逼柵存進出戰橋  
上殺其兵殆盡而存進亦歿於陣追贈太尉

宋



袁繼忠振武人父進事周為防禦使繼忠以父任補右班殿直宋太祖平澤潞討并汾悉預攻戰與都巡檢郭進掠地忻代太宗時契丹入代境繼忠護高陽關與崔彥進破長城口殺獲數萬衆金書褒美累功遷上閤門使為人長厚忠謹士大夫多與遊子用成雍熙甲登進士第官太常博士

王承美豐州人其父事契丹為左千牛衛將軍開寶二年率衆來歸父卒授天德軍蕃漢都指揮豐州刺史太平興國七年與契丹戰斬獲萬衆擒其天德軍節度使韋太以獻明年契丹入寇承美又擊敗其衆



追至青冢百餘里於豐州城置孔子廟

姚兕五原人父寶戰死定州兕補右班殿直為環慶  
巡檢與夏人戰一矢斃其酋象潰遂破蘭浪駐荔原  
堡敵入寇邊有悍酋臨陣甚武兕射之中斬其首還  
一軍驩呼手射數百人裂指流血賊衆復攻大順城  
兕往救之轉鬥三日斬級數千卒全二城神宗聞其  
名召入見試以騎射屢中的賜銀槍袍帶戰勝攻取  
所向必克累功拜通州團練使卒贈忠州防禦使兕  
幼失怙事母孝凡圖書器用皆刻仇讐未報字力學  
兵法老不廢書尤喜顏魯公翰墨曰吾慕其人耳弟



麟亦有威名關中號二姚兒攻河南時麟在兵間中  
矢透骨鏃留不去以強弩出之笑語自若累功進都  
指揮使節度建雄定武軍檢校司徒卒帝詣其第臨  
奠贈開府儀同三司為將沉毅持重不少縱捨宿衛  
士常犯法詔釋之麟杖之於廷而後請拒詔之罪故  
所至肅然子雄古佐父征討有功雄少勇鷙有謀歷  
知岷會河熙州遷至武康節度使卒諡武憲古累官  
熙河路經畧靖康中總兵援太原與金人戰种師中  
敗死古兵潰安置廣州孫平仲古之子靖康中為太  
尉金人圍汴都平仲夜出攻敵營不利逸去隱青城



大面山建炎初以觀察召之不出後有人於丈人山  
過年幾百餘歲

金

程震東勝州人與其兄鼎俱第進士興定初震為陳  
留令治為河南第一召拜監察御史彈劾無所撓時  
皇子荆王為宰相家僮輩席勢侵民震以法劾之奏  
曰荆王以陛下之子任天下之重不能上贊君父同  
濟艱難顧乃專恃雄勢蔑棄典禮開納貨賂進退官  
吏縱令奴隸侵漁細民名為和市其實脅取諸所不  
法不可枚舉陛下不能正家而欲正天下難矣于是



上責荆王杖大奴不法者數人未幾坐為故吏所訟  
罷官歲餘嘔血卒

完顏陳和尚名彝字良佐以小字行豐州人系出蕭  
王諸孫年二十餘為元兵所掠太師甚愛之置帳下  
時母留豐州從兄安平都尉斜烈事之甚謹陳和尚  
在元歲餘托以省母亡還太師使卒監之至豐乃與  
斜烈劫殺監卒奪馬奉母南奔元兵覺合騎追之由  
他路得免既而失馬母老不能行載以鹿角車兄弟  
共挽南渡河宣宗奇之斜烈以世官授都統陳和尚  
試補護衛未幾轉奉御斜烈行壽泗元帥在事奏陳



和尚自隨詔以充宣差提控佩金符陳和尚天姿高  
朗雅好文史自居禁衛日人以秀才目之踰年轉忠  
孝軍提控五年元兵入太昌原平章合達問誰可為  
先鋒者和尚出應命先已沐浴更衣若將就木檉者  
擐甲上馬不反顧是日以四百騎破八千衆奏功第  
一手詔褒諭授定遠大將軍九年正月三峯山之敗  
走鈞州城破元兵入即縱兵巷戰陳和尚趨避隱處  
殺掠稍定乃出自言曰我金國大將欲見白事兵士  
以數騎夾之詣行帳問其姓名曰我忠孝軍總領陳  
和尚也太昌原之勝我也衛州之勝倒回谷之勝亦



我也我死亂軍中人將謂我有國家今日明白死天下必有知我者元兵欲其降斫足脛折不為屈割口吻至耳喫血而呼至死不絕大將義之酬以馬潼祝曰好男子他日再生當令我得之時年四十一詔贈鎮南軍節度使塑像褒忠廟金史入忠義傳

元

謝睦歡豐州人以資雄鄉里大兵南下轉客瓦剌城太祖攻西夏過其城睦歡與其帥迎降從攻西京睦歡先登連中三矢仆城下太祖見而憐之命軍校拔其矢縛牛刳其腸裸而納于牛腹中良久乃甦誓以



死報每遇敵必身先之官至太原路金銀鐵冶達魯  
花赤予仲溫豐頤廣穎聲音洪亮畧涉書史見世祖  
于野狐嶺命備宿衛凡所行幸必在左右城上都以  
仲溫為工部提領董其役後大軍圍鄂今督將守江  
時軍士乏食仲溫教之鬻魚人賴以飽帝喜謂侍臣  
曰朕思不及此飲以駝乳一夕帝聞敵軍譟噪命警  
備仲溫奉繩床帝憑其肩以行至旦不能寐中統元  
年擢平陽太原兩路宣撫使二年改西京至元九年  
遷順德路總管時方用兵江淮有寡婦鬻子以償轉  
輸之值仲溫出俸金贖還之十六年為湖南宣慰使



二十二年改淮東歲旱仲溫導白水塘溉民田公私  
賴焉三十年春入見帝從容與語攻鄂時事曰汝將  
復官乎朕當為卿擇之對曰臣老矣無能為也大德  
六年卒年八十元史有傳

程思廉其先洛陽人元魏時以豪右徙居雲中遂家  
東勝州為東勝州人父恒國初佩金符為沿邊監榷  
規運使解州鹽使思廉以太保劉秉忠荐給事裕宗  
藩邸以謹愿聞命為樞密院監印平章政事哈丹行  
省河南署為都事丞相史天澤尤器之時方規取襄  
樊使任轉餉築城置倉以受粟至元十二年調同知



淇州從東平路判官入為監察御史以劾權臣阿合  
馬繫獄其党巧為機宥思廉居之泰然卒不為害累  
遷河南河北道按察副使道過彰德聞兩河歲饑而  
徵租益急欲止之有司謂法當上請思廉曰若然則  
民不堪命矣即移文罷徵後米得請二十六年立雲  
南行御史臺思廉時丁母憂起復為御史中丞始至  
蠻夷酋長皆來賀詢若遜而意甚倨思廉奉宣上意  
綏懷遠人且明示禍福使毋自外聞者懾服雲南舊  
有學校而禮教不興思廉力振起之始有從學問禮  
者成宗即位除河東山西廉訪使累任風憲剛正嫉



惡言事剴切如早建儲貳訪求賢俊辨車服議封諡  
養軍力定律令皆急務也思廉好荐達人物或者以  
為好名思廉曰若避好名之譏則人不敢為善矣卒  
年六十二諡敬肅事見元史

以上立功

遼

邊貫道豐州人狀元及第三子長元勳遷雲中金天  
會十年進士終河間路轉運使次元鼎元恕並以文  
學著名

元



孟攀麟字駕之南內人祖鶴父澤民皆金進士攀麟幼日誦萬言能綴文時號奇童金正大六年進士仕至朝散大夫摺討使歲壬寅汴京下北歸居平陽而午為陝西帥府詳議官遂家長安世祖中統三年授翰林待制同修國史至元初召見條陳七十事大抵勸上以郊祀天地祠太廟制禮樂建學校行科舉擇守令以字民儲未粟以贍軍省無名之費罷不急之役百司庶務統於六部紀綱制度悉由中書是為長久之計世祖悉嘉納之後論王伯一許平仲優劣對曰伯一文章之士可置翰苑平仲明經傳道可為後



學於式帝深然之又嘗召問宗廟祭祀儀制攀麟志  
據經典以對詔令會太常議定禮儀攀麟夜畫郊祀  
及宗廟圖以進帝皆親覽焉復以病請西歸帝令就  
陝西五路四川行中書省事四年卒年六十四延祐  
三年贈翰林學士承旨平原郡公諡文定見元史

趙世延字子敬其先雍古族人居雲中北邊天姿秀  
發喜讀書究心儒者之學弱冠世祖召見俾入樞密  
院御史臺肄習官政預修經世大典散歷省臺五十  
餘年凡軍國利弊生民休戚知無不言而於儒者名  
教尤拳拳焉為文章浩瀚一根至理嘗校定律令彙



次風憲宏綱行於世卒年七十有九封上柱國魯國  
公諡文忠見元史

李巖雲川人初業儒溥於仕進博覽經史旁通書算  
之學初為和甯路學正以道不合棄歸日以著述為  
事嘗採衆說釋朱子集註名曰經筵講稿凡四十九  
卷具表上進終身不仕

吳明志雲川人累官國子監助教文學重於一時嘗  
獻定邊萬言策行於世

杜唐卿雲川人曾為浙江省參政德學高古

以上三人通志

俱在大同府人物部而左雲鄉賢祠記亦有其名朔平府志亦載入文行矣雲川為雲內州屬也明正統



中葉殺虎口外地始以雲川併入左衛元時雲川仍在口外也

以上立言

按立德立功立言古人謂之三不朽者雖有太上其次之分然愚意德言功之立各有其志各因其時非謂立功之必不如立德立言之必不如立功也豐州鄉賢既無專祀府志以忠孝事功文行選舉等目分門別類取法歷代史傳之體俾覽者得知人論世其例頗詳惟所傳寥寥數人統朔平一府而言尚可以分別門類若祇口外一隅其門類率多空設且一人而兼數事



者因此失彼轉難取棄晉省有三立祠因倣其  
意畧為區別非有所軒輊其間謂有功者無德  
有言者無功也且別部俱迄

本朝惟鄉賢則止於元代有明豐勝等州未入中國  
史策無所紀載我

朝雖五廳分設而學校未立寄居者子弟應試仍回  
原籍二百餘年縉紳履歷無歸化城人或和林  
格爾人及薩拉齊人字樣是鄉賢之名

國朝人斷難增附矣至古今地名以及郡縣所屬廣  
狹不一知不免牽涉附會之咎閱者諒之



古豐識畧卷三十

長白鍾秀石帆

初稿

崞縣張曾小袁

人部

流寓

漢

蘇武字子卿杜陵人父建以校尉從大將軍出定襄擊匈奴築朔方為代郡太守封右將軍平陵侯武少以父任為郎天漢元年且鞮侯單于初立盡歸漢使路充國等留匈奴者漢遣武以中郎將使持漢節送



匈奴使留漢者厚賂單于答其善意單于益驕方欲

發使送武等會長水胡人虞常等謀殺漢降人衛律

劫單于母閼氏歸漢事洩語連副使張勝及武匈奴

置武燼火上氣絕半日復息因劍斬虞常欲脅降勝

武勝遂降武不為屈復幽武置大窖中

相傳卽今海窟絕飲

食天雨雪武卧齧雪與旃毛食之數日不死乃徙武

北海上無人處使牧羶羶乳乃得歸武仗漢節牧羊

卧起操持節旄盡落及李陵敗降匈奴單于使陵至

海上為武置酒設樂與飲數日反覆開說武終不聽

曰自分已死久矣必欲降武請畢今日之歡效死君



前陵見武至誠喟然歎曰嗟乎義士陵與衛律之罪  
上通於天矣因泣下霑襟與武決去後聞武帝崩武  
南嚮號哭數月昭帝即位匈奴與漢和親乃歸武武  
留匈奴凡十九歲始元六年春還京師始以強壯出  
及歸鬚髮盡白拜典屬國宣帝朝衛將軍張安世薦  
武明智故事奉使不辱命著節老臣賜爵關內侯令  
朝朔望號稱祭酒甚優寵之年八十餘神爵二年卒  
後單于來朝上思股肱之美與大將軍博陸侯等十  
一人圖畫於麒麟閣子元坐與上官安謀論死武前  
發匈奴時胡婦適產一子名通國有聲問來武因平



恩侯自白因使者致金帛贖之上許為後通國隨使  
者至上以為郎

常惠太原人少時家貧自奮應募隨蘇武使匈奴并  
見拘留十餘年與武同患難昭帝立漢求武等歸匈  
奴詭言武死後復使至匈奴惠請其守者與俱得夜  
見漢使具自陳道教使者謂匈奴言天子射上林中  
得雁帛書言武等在某澤中單于視左右驚謝漢使  
曰武等實存武乃得與惠九人歸漢嘉其勤勞拜光  
祿大夫

鄭衆字仲師河南開封人年十二從父興受左氏春



秋精力于學永平八年以明經給事中持節使匈奴  
衆至北庭虜欲令拜衆不為屈意氣壯勇雖蘇武不  
過單于怒圍守閉之不與水火以脅服衆衆拔刀自  
誓單于恐而止乃更發使隨衆還京師後受詔作春  
秋刪十九篇卒於官

唐

溫彥博字大臨并州祁人父若猷兄大雅俱以文行  
知名開皇末對策高第授文林郎直內史省突厥入  
寇以并州通行軍長史戰敗被執突厥知彥博近臣  
數問唐兵多少及國虛實博不肯對因陰山苦寒地



高祖立突厥歸款乃得還遷中書令封虞國公突厥  
降詔議所以安邊者博請如漢置降匈奴五原塞以  
為藩蔽帝從之卒諡曰恭陪葬昭陵

李益字君虞與韓翃齊名每作一詩教坊輒求取為  
供奉歌詞少多猜忌防閑妻妾有散灰扃戶之事時  
謂妒癡登進士第久不調而流輩多居顯位益不得  
意北游河朔有登長城及飲馬泉夜上受降城聞笛  
等作幽州劉濟辟為從事憲宗聞其名自河北召還  
用為學士自負材地多所陵忽為衆不容諫官舉其  
在幽州詩有不上望京樓之句因降居散秩俄復用



太和初以禮部尚書致仕

杜牧遊邊詩有日暮拂雲堆下過似親至邊城者牧  
字牧之京兆人第進士舉賢良方正為牛僧儒淮南  
節度府掌書記擢監察御史歷知制誥遷中書舍人  
牧有奇節不為小謹指陳利尤切至卒年五十詩情  
致豪邁人號為小杜以別子美云

許棠字文化涇縣人久困名場晚年登第授涇縣尉  
又嘗為江陵丞有五原書事詩與塞上下曲不同必  
親至五原者又同時張喬有書邊事詩似亦至此

張翊字象文唐末登第尉櫟陽避亂入蜀蜀王衍時

病



為金堂令徐后游大慈寺見壁間題云牆頭細雨垂  
織草水面回風聚落花問寺僧僧以蠓對乃賜霞光  
牋令寫詩以進蠓進詩二百首衍善之召為知制誥  
有登單于臺朔方書事雲朔遇山友詩其曾游於此  
可知

儲嗣宗有過五原詩

金

麻革字信之臨晉人祖秉彝皇統九年進士官兵部  
主事革生中條王官丘老之下長侍其先人西觀太  
華東游玉洛遂避地家焉北渡後嘗自雁門踰代嶺



之北留滯居延己亥夏赴試武川及秋歸道渾水訪  
劉祁京叔於渾源登龍山絕頂自作遊記隱居教授  
而終人稱為貽溪先生有上雲內帥賈若詩載河汾  
諸老集中曹學閔為補作小傳

元

劉秉忠少為僧世祖自蕃邸一見留侍左右即見親  
任密謀大計莫不與焉受命後以天下為己任知無  
不為其於陰陽術數之學占事知來若合符契卒諡  
文貞有過豐州及雲內道中詩蓋未過時曾遊此

國朝



崔封翁名據元代州茹澣人少孤貧隻身游塞上在  
城西鄉三間房子一帶種地為業衣食漸致充裕性  
慷慨好施與遇貧乏者輒傾囊給之一夕大風雪夢  
虎卧門側晨啟視則夫婦行乞婦產一男恐不能收  
育欲棄未忍者也翁亟取子之並以錢米周其夫婦  
問姓名不告而去翁自得子後家益豐延師課讀取  
名映淮登進士為縣令有治聲孫五峯進士官陝西  
甯羗州特峯進士官四川成都府九峯拔貢生官教  
諭曾孫五人元孫十數人俱以詩書世其家為雁門  
望族五峯特峯兄弟同科封翁猶親見之人以為積



善之慶映淮既貴後有議其非崔氏族者封翁欲命  
之歸宗族人共挽留之乃止迄今無異言且藉以輝  
門閥焉

劉天元代州陽明堡人種地於歸化城西祝樂慶村  
耕九餘三業漸豐裕少苦貧家既富益知貧者之苦  
凡有周恤無吝心無德色村氓賴以舉火者遠近數  
十百家每春出冬歸歲以為常嘉慶中歲饑天元冬  
暮旋里先期按貧乏者出粟畀之將行村人走送數  
里外揮涕泣叩其故曰俟翁明歲出關吾輩已填溝  
壑矣天元亟返轡盡出其倉庾所儲計算戶口以斗



斛分給其稍有力者亦減價平糶約來歲取償數日  
後乃行比至家則爆竹聲聞而屠蘇之資猶未備也  
草草度歲復策蹇來城躬耒耜課賄雨數年積貲累  
萬市廛之設幾半豐州而好施益甚年八十餘卒子  
孫至今稱鉅富祝樂慶左右居民談者尤津津不置  
每自謂吾祖父當日曾食劉氏粟云

李鷹昇嶧縣孫家墮人少貧以橐駝遊山後蒙古部  
落善蕃語性樸直蒙古王公見勒喜與之交貨物較  
他人易售同業者每合本資其貿易輒坐取利焉家  
漸富不吝施與親族貧乏者多藉以謀生中歲無子



買妾歸化城入門則其夫以負賭債鬻妻者也婦涕泣不忍食鷹昇嗾呼其夫至還之弗索聘值其夫感謝誓終身不復賭博鷹昇旋里後以弟之子楨為子今任四川成都府新繁縣知縣晚生子幹國學生人以為厚德之報

吳韻鴻字笛江江蘇上元人嘉慶戊寅科舉人道光癸巳科進士任崞縣知縣少極貧以筆耕為業游吳越齊魯間風流倜儻當道爭羅致幕下所著有荃石居詩詞文章傳誦半天下登第時年已四十矣并門需次屢捧檄為塞上之行集中登清水河署樓七古



自殺虎口至和林格爾五律津津人口在崞後仁風  
惠政洋溢遠邇攝靈石臨汾縣事所至有賢父母名  
尤汲汲以援引寒士為先務退食餘暇問字者踵相  
接焉卒之日囊無一錢老母弱息債負累累崞人為  
歸其喪近聞其子廷讓已弱冠游泮水士林每跂望  
之冀其克紹先澤云

張守禮字立齋崞縣監生兄守仁字仲安號景袁以  
拔貢生講學里居晉汾南北間聞張夫子之名輒翕  
然以儒宗推之立齋少兄十四歲規行矩步終身師  
事無少衰道光庚寅辛卯間崞縣邪教案起當事者



欲興大獄立齋受邑令李公

諱衡字望峯廣西舉人

屬偽入教

以覘之盡得其實燒香惑眾外無他謀也獄賴以定

受惠者指不勝屈人又服其膽識兼備非斤斤以章

句為儒者矣五旬遊塞上居東鄉買岱村數年足跡

不入城市間兄喪徒步而歸年七十餘以壽終於家

田鎮原名柘字辛岩崞縣人家鉅富性嗜買書及金

石文字鼎彝圖書約冠遊京師受業於翁覃溪

方朱綱

虹橋

方增

蔡中甫

定之

之門數公夙精賞鑒辛岩益觸所

好舉四庫書籍秦漢以來碑版硯石印石諸骨董器

皿日輦而致諸家家有卓觀樓百二十硯齋等室為



藏弄所摩挲繙閱日無停晷有就觀者輒置酒食作  
數日留晚歲家遠以貧不能給朝夕塞上舊有田若  
千頃少時曾未一問其豐歉者不得已攜書游龐畝  
間坐薄笨車手一編囊古器數事見者輒以癡日之  
輕薄者至問其所挾有顏淵瓢曾參席孔子扣原壤  
杖否弗顧也既其田又為有力者所奪抑鬱以死其  
子鬻書籍葬之每卷有篆印曾經卓觀樓藏六字見  
者又服其達



